



De forma completamente anómala este ano 2020 non celebramos o XXXV Foro de Encrucillada «Relixión e Cultura en Galicia». As razóns son obvias: a virulencia da pandemia da COVID-19 desaconsella, especialmente nesta segunda vaga, a celebración de eventos en espazos pechados onde poidan aglomerarse un número considerable de persoas.

Malia todo, as lectoras e os lectores da nosa revista atoparán neste número de final de ano o que ían ser os relatorios dos nosos convidados a compartir connosco presenza e sabedoría en Santiago de Compostela se as circunstancias tivesen sido outras. Pero son as que son e iso non está na nosa man cambialo.

Pero si o está buscar camiños alternativos que nos permitan superar as limitacións impostas pola lóxica prudencia sanitaria. E por iso queremos convocar a todos os nosos lectores, e a todas aquelas persoas que poidan estar interesadas, a participar en tres encontros telemáticos cos nosos relatores: Marta García, Carmen Bernabé e Andrés Torres Queiruga. Os encontros son de balde, están abertos a todo o mundo e serán tres venres de febreiro, os días 12, 19 e 26, ás 20.00 a través da plataforma Zoom, cun enlace que anunciaremos debidamente na nosa web www.encrucillada.gal. Chamámoslos *Coloquios na Encrucillada*.

Comezaremos eses coloquios cunha breve presentación, para dar paso, a continuación, ao relator principal. En cada sesión, a relatora ou relator disporá duns vinte ou vinte e cinco minutos para presentar os puntos centrais e máis importantes do seu traballo publicado neste número. E logo, ao rematar a súa exposición, dispoñeremos nós, os oíntes, doutro tanto tempo para iniciar un diálogo e formularmos cuestións, preguntas, suxestións, etc., que permitan afondar no escoitado nese momento e no previamente lido neste número. Remataremos eses coloquios cunhas breves palabras finais do moderador.

O tema do Foro deste ano ía ser «Como ler hoxe a Biblia». Diso tratarán os *Coloquios*. E diso trata, fundamentalmente, o número que aquí presentamos. Indico moi rapidamente o seu contido.

A profesora Marta García encárgase de sinalarnos o mellor acceso a esa enorme biblioteca de libros históricos, proféticos e sapienciais que é o Antigo ou Primeiro Testamento. A profesora Carmen Bernabé céntrase no Novo ou Segundo Testamento e sinala a diversidade de métodos exexéticos que hai para facer actual e intelixible a súa lectura. O profesor Torres Queiruga afonda na cuestión hermenéutica ao identificar o perigo sempre latente dun fundamentalismo encriptado propoñendo a súa superación coa súa traballada categoría de «maiéutica histórica».

O fondo bíblico do traballo poético do recentemente finado Ernerto Cardenal é posto de manifesto por Ramón Cao nunha achega que, xunto coa bibliografía bíblica seleccionada e comentada por Carme Soto e ofrecida noutra achega, aportan novos datos para enriquecer o tema da Biblia principalmente estudado aquí.

Publicamos, tamén, un testemuño da presenza da COVID-19 en África. Concretamente en Etiopía, da man do misioneiro comboniano, Juan González Núñez.

Xunto á Rolda de Igrexa de Manolo Regal e a unha recensión de Marisa Vidal sobre un libro que trata a figura de María de Magdala, publicamos tamén un documento de apoio á autonomía dunha asociación brasileira de mulleres para presentarse publicamente coma católica, pese a todos os matices —nos que aquí non entramos— que se poidan presentar respecto das súas reivindicacións máis concretas.

Tito Suárez Pérez fai a presentación xeral do tema do Foro deste ano que, como xa dixen, retomaremos en febreiro, en modo telemático, na amentada forma dos *Coloquios na Encrucillada*. Contamos coa vosa participación.

Pedro Castelao